

Aalisakkanik tukertitsivinnik, ilaatillugit kapisilinnik tukertitsivinnik Kalaallit Nunaani aallarnisaasut qanoq tapersorsinnaaneri pillugit apeqquteqaatip oqallisiginisaanut siunnersuut.

(Siverth K. Heilmann, Atassut)

Akissuteqaat

(Inuussutissarsiornermut Aatsitassanullu Naalakkersuisoq)

Siullermeeerneqarnera

Naalakkersuisut sinnerlugit Siverth K. Heilmannip Atassummeersut apeqquteqaatip oqallisiginissaa pillugu siunnersuutaanut qujavunga.

Aalisakkanik tukertitsiveqarnerup ineriartormik pilersitsisumik tamatsinnut iluaqutaasussatut qanoq inuussutissarsiutigineqalersinnaanerata paasiniaaviginissaata pingaaruteqarnera isumaqatigaarput. Taamaattumillu Aalisarneq pillugu Ataatsimiititaliarsuarmut suliaasanut allattorsimaffiani aama suliaassarigaa: '*...imaani uumassusilinnik atuisinnaanermut kiisalu aalisakkanik tukertitsinermik ineriartortitsisinnaanermut, avammut tunisassiorneq annertusarniarlugu periarfissat misissorlugillu nassuiaateqarfigissagai.*' ersippoq.

Ullumikkut nunani sanilitsinni aalisakkanik tukertitsiviit suliffissuaqarfingornikuupput. Norgemi Savalimmiunilu kapisilinnut tukertitsiviit inuussutissarsiorfiupput nalilerujussuit. Taamatuttaaq Islandimi nipisanut tukertitsivinnik pilersitsisoqarsimalluni, assersuutigalugu Savalimmiunut tukertitsiveqarfinnut tunineqartartunik. Nipisaat atorlugit piujuaannartitsinermik tunngaveqartumik kapisillit kumaat piiarneqartarput.

Tassa piujuaannartitsinermik tunngaveqartumik ingerlaavarsinnaasumillu inuussutissarsiortoqarsinnaanissaa ineriartortitsinissamut periarfissarpassuaqarpoq. Taamaattoqarsinnaanerali imaaliallaannarneqarsinnaangilaq, aamma soorunami ajornartorsiutaasinnaasunik aqqusaagassaqarpoq. Assersuutigalugu nunat imaani tukertitsivillit aalisakkat tukertinniakkat aalisakkanut nujuartanut nappaatinik tunillaasinnaaneri qumaqalertitsisinnaanerilu ajornartorsiutigisarpaat. Tassungalu tunngatillugu Nunat avannarliit Kapisillit piujuaannartinneqarnissaanut kattuffimmut (NASCO) ilaasortaanitsinnut pisussaaffilerneqarnikuuvugut, taannalu tunngavigalugu tukertitsisoqarnerani nakkutilliinernik, nalunaaruteqarnernik nappaatinillu akiunissamut malittarisassaarluta.

Aammattaarli pinngortitarsuatsinnit alianaatsorsuarmit, silaannaallu nillissusaanit peqquteqartumik Kalaallit Nunaanni tukertitsiveqarnermik misiliisarsimanerit ajornartorsiorinneqartarsimapput. Pissutsilli allanngoriartuinnarput, maannakkullu silaannaap kissatsinnikuunerata kingunerisaanik Kalaallit Nunaanni kapisilinnik tukertitsisinnaanermi atugassarititaasut pitsannguuteqarnikuupput.

Aammattaaq nunami tukertitsiveqarnissaq periarfissaavoq. Tassani allanik unamminiagassaqaassaaq, nunaminertamik illunillu pisariaqartitsisoqassalluni unamminiagassaappulli suleqatigiikkutta qaangerluarsinnaasagut.

Aallarnisaasut piujuaannartitsinissamik tunngaveqarlutik aalisakkanik tukertitsiviliornissaat inatsisit atuuttut malillugit iluamik ingerlanneqarsinnaanngippata, taava Naalackersuisut inatsisini atuuttuni aaqiinnissaminnut piareersimapput. Iisimavarput, tukertitsiveqarnissaq siuarsarniarlugu assersuutigalugu Kalaallit Nunaannut uillunut assigisaannullu nalunaarusiamik suliaqartoqarnissaa Royal Greenlandip ilaatigut saqqummiunnikuugaa.

Aallarnisaarusussusillit tukertitsivinnik ingerlatsillutik misileerusuttut aningaasaliiffiqineqarnissaannut aningaasanik immikkoortitaqarpoq. Maannakkumut taperneqarnissaminnut qinnuteqartut pilersaarutitut kontimit Aalisarnermut, Piniarnermut Nunalerinermullu Naalackersuisoqarfimmit aqunneqartumut qinnuteqaatigineqarsinnaapput. Pilersaarutitut kontomi nunatsinni aalisarnermut pilersaarutit, annikitsumik aalisarnermik tunngavillit salliunneqartarput. Aammattaaq Innovation Greenlandimit aallarnisaasut pilersaarutaannik siunnersuinissamut tapersiinnissamullu piareersimasoqarpoq.

Kalaallit Nunaanni nutaanik tunisassianut ilassusiinnaasup inuussutissarsiutip pissanganartup inerisarnissaanut pitsaanerpaanik sinaakkusersorlugu peqatigiilluta oqallitta.